



25 SEP, 2025

Festival Permainan Malaysia sasar lebih 100,000 pengunjung

Utusan Malaysia, Malaysia



Festival Permainan Malaysia sasar lebih 100,000 pengunjung

Oleh MUHAMMAD
RIDZWAN RAMLI
utusannews@mediamulia.com.my

KUALA LUMPUR: Jabatan Kesenian dan Kebudayaan Negara (JKKN) Wilayah Persekutuan Kuala Lumpur menyasarkan lebih 100,000 pengunjung bakal menghadiri Festival Permainan Malaysia (FPM@Putrajaya).

Festival itu bakal diadakan selama empat hari, bermula 25 hingga 28 September ini bertempat di Dataran Putrajaya.

Festival tersebut yang telah memasuki tahun ke-10 penganjurannya berjaya mengangkat permainan tradisional supaya lebih diminati bukan sahaja oleh rakyat tempatan tetapi juga pelancong asing.

Festival itu merupakan acara di bawah Kalendar Pelancongan Budaya yang diadakan setiap tahun bagi mengetengahkan keunikan seni budaya negeri.

Timbalan Pengarah Jabatan Kesenian dan Kebudayaan Negara (JKKN) Kuala Lumpur, Shahrizal Abdan berkata, penganjuran festival bukan sahaja menyebarkan permainan tradisional dalam kalangan masyarakat malah ia turut membantu mempromosikan Tahun Melawat Malaysia 2026.

Beliau berkata, tahun ini me-



SHAHRIZAL ABDAN

rupakan kali pertama festival diadakan di Putrajaya.

“Sejak diadakan pada tahun 2015, inilah kali pertamanya kita adakan di Dataran Putrajaya.

“Salah satu sebabnya kami memilih ruangan yang lebih luas dan bersejarah, selain memberi peluang masyarakat setempat menyertai acara tahunan tersebut,” katanya ketika ditemui.

Katanya, sebanyak 12 pasukan bagi kategori badan beruniform menyertai FPM@Putrajaya 2025 terdiri daripada juara bertahan kejohanan itu iaitu Dewan Bandaraya Kuala Lumpur (DBKL).

Pasukan lain adalah seperti Majlis Sukan Angkatan Tentera,

Jabatan Sukarelawan Rakyat Malaysia yang menghantar sebanyak dua kontinjen, Jabatan Imigresen Malaysia, Agensi Anti Dadah Kebangsaan, Agensi Penguatkuasaan Maritim Malaysia, Polis Diraja Malaysia, Jabatan Bomba dan Penyelamat Malaysia, Jabatan Penjara Malaysia, Jabatan Kastam Diraja Malaysia dan Angkatan Pertahanan Awam.

Beliau berkata, sebanyak 10 penyertaan akan berentap bagi kategori korporat terdiri daripada Perbadanan Tabung Pendidikan Tinggi Nasional, RHB Bank Berhad, Keretapi Tanah Melayu Berhad, Malaysia Airports Berhad, Tourism Malaysia, Tenaga Nasional Berhad, Berita Nasional Malaysia, Bank Simpanan Nasional, Bank Muamalat, dan Kelab Sukan dan Rekreasi Petronas.

“Kategori Institusi Pengajian Tinggi (IPT) turut dipertandingkan yang melibatkan tujuh IPT terlibat terdiri daripada Universiti Islam Antarabangsa (UIA), Universiti Pertahanan Nasional Malaysia (UPNM), Akademi Seni Budaya dan Warisan Kebangsaan, Management and Science University, Kolej Poly-Tech MARA, Universiti Kebangsaan Malaysia (UKM), serta, Institut Pendidikan Guru,” katanya.